



豉梅仔

梅仔酸酸的滋味，是我上愛的滋味。尤其以早細漢的時，厝裡無遐爾富裕，無錢通來買啖糝，阿母豉的梅仔就是囡仔上讚的四秀仔！

今年梅仔敢若大出的款，面冊定定看著果子店咧「Po 文」推銷梅仔。頂改同窗會的時，同學嘛分享伊家己豉的梅仔，真正是食了會繼喙。這幾工同學嘛講伊閣開始咧豉梅仔，閣講食一粒梅仔，會使減食真濟藥仔，嘛招我做伙豉梅仔。看伊講甲喙角全泡，閣真分張共豉梅仔的撇步傳予我，我就規氣嘛買二十斤來豉。

梅仔買來愛先洗予清氣，才共梅仔囡仔箴仔內，糝一寡鹽用手共梅仔掙掙咧。細漢囡看著感覺真趣味嘛來鬥掙，聽講這是欲共梅仔的苦澀掙出來，尾仔才閣用清水共進前的鹽水洗掉。洗掉了後，就會使共梅仔囡仔箴仔，提出去外口曝日頭。梅仔曝三、四工，就會使囡仔玻璃甕仔，鋪一沿梅仔一沿糖，囡一工了後才共糖水摒掉，閣摻一寡糖入去。就按呢，共賭的糖沓沓仔摻入去。差不多愛半年到一年了後，才會使開甕仔來食。

家己豉梅仔，雖罔會較無閒，不而過，逐工攏鼻著梅仔的清芳。頭起先有青梅澀澀的味，繼落去曝日頭彼幾日，芳味沓沓仔佇空氣中炭開，炭甲一四界攏是。暗時欲暍的時，有梅仔芳陪伴阮入夢，加真好暍。

這予我想起以早仔後頭厝，阿母逐年攏會豉梅仔。不而過，阿母是用一寡歹去無咧用的紗門，面頂囡梅仔曝仔埕裡。因為阿母捷捷豉梅仔，阮兜規年迴天攏有梅仔通食。同學知影阮兜有好食物，逐禮拜攏來阮兜食梅仔。

印象上深的一擺是梅仔食了矣，阿母閣揣看有梅仔無。因為阮拄搬厝，阿母煞袂記得梅仔囡仔佗位。看阿母反東反西，上尾伊揣著一甕色水烏金仔烏金的梅仔出來。阮真懷疑是毋是梅仔歹去矣，我刮一粒食看覓，哇！這甕梅仔的氣味有夠讚的！原來梅仔恰酒相醞，愈囡愈芳、愈囡愈好食。

家己豉梅仔，感覺真心適，嘛體會著逐粒梅仔攏是豉梅仔的人用心豉的，才有遐爾好食的梅仔通食。

作者：田美瑜

☆詞彙學習☆

【啖糝】tām-sám：零食、零嘴。

【大出】tuā-tshut：盛產。通常指蔬果類。

【繼喙】suà-tshuì：合口味。形容東西合胃口、好吃，一口接一口，愈吃愈想吃。

【講甲喙角全泡】kóng kah tshuì-kak tsuân pho：說得口沫橫飛。

【分張】pun-tiunn：通常指小孩子慷慨大方願意將食物分給他人。

【箴仔】kám-á：用來盛裝物品的圓形淺竹筐。

【掙】juê/lê：揉、搓。

【刮】khat：舀。